

SYNOD EXECUTIVE COMMITTEE VAWI 238-NA THURELTE

* Manipur Mission Field hnuaiia thawkte lak chhuah tura tih a ni

* Ruihhlo donaa hma latute tha tichak zâwnga hma lak dan tur Social Front kutah.

Mizoram Presbyterian Kohhran hnuaiia committee pawimawh Synod Executive Committee (SEC) vawi 238-na chu February 21-23, 2012 chhung khan J.M. Lloyd Hall, Synod Office-ah Moderator, Rev. Thangzauva kaihhruaiin tluang taka neih a ni a. He committee-ah hian member 146-ah 125 an kal a, kum 2011 Synod Inkhawmpui thurel bawhzui ngai bawhzui a ni ber a, thurel langsar zual hetiang a ni -

1. Manipur Mission Field hnuaiia thawkte lak chhuah tur: Manipur Mission Field dinhmun leh boruak thlira 2011 Synod Gen. 67-in Meitei Synod hawn tura PCI General Assembly-a rawtna thlen a rel avangin thawktute dinhmun tihchian thuai tula hriain Manipur Field-a thawktute chu a rang thei ang bera lak chhuah tura rel a ni. He Mission Field-a Pastor-te awm dan tur chu Officers Meeting (OM) rel tura dahin, Missionary-te awm dan tur chu Synod Mission Board rel atana dah a ni thung.

2. Ruihhlo dotute puihna: Ruihhlo (Zu, Drugs, Tiranga, etc) do kawnga hma latute tha tichak zawnga Kohhranin hma lakpui tura 2011 Synod-in a rel chu bawhzuiin, 'Synod Social Front Committee-in a tihhlawhtlin dan lo zawng rawh se,' tih a ni.

3. Assam nena ramri tichiang tura sawrkara rawtna: 2011 Synod-in a rel, Assam nena ramri tihchian chungchanga sawrkara rawtna thlen thu-ah "Mizoram Sawrkarah thlen ni sela, SEC aiawhin OM member-ten Chief Minister leh Home Minister lo hmu rawh se," tih a ni.

4. Central KTP Leader leh General Secretary ruat thar a ni: Kum hnih (*term* khat) atan Kristian Thalai Pawl Leader-ah Rev. Lalrinmawia, Maubawk Bialtu Pastor ruat a ni a. General Secretary-ah term hnih he mawhphurhna lo chelh tawh, Upa Lalrinmuana (Synod Office) ruat thar leh a ni bawk.

5. Synod Youth Recreation Centre: Hlimen-a KTP-in Synod Youth Recreation Centre an neih chu a panna kawng leh thil dangah a hautak deuh avangin, Synod Multipurpose Training Centre sak tur Plan awm mekah he Centre tur hi telh ve an dil a. Synod Youth Recreation Centre hmun pek theih dan kawng zawn ni sela, a hmun tur erawh chu la ngaihtuah ni se, tih a ni.

6. Pune-a Biak In kâng tanpuina: Nikum November ni 28-a Pune Mizo Christian Fellowship-te inkhawmna in kângah bungrua tam tak a kan ral avangin Synod-a tanpuina an dil angin ₹ 1,00,000/- (cheng nuai khat) pek remtih a ni.

7. SMB-ah hna nget 38: Synod Mission Board-in an dil angin hna nget (*permanent post*) 38 siam thar remtih a ni.

8. Pastor/Minister dah tharna tur: Orissa leh Cambodia-a Ordained Minister dah chungchang leh Bangalore Mizo Presbyterian Church enkawltu tur rel fel chu Officers Meeting (OM) kutah dah a ni.

9. Chhim Biala Hospital din: Synod 2011-in Chhim Biala Hospital din chungchanga a tûl anga hma lak zel tha a tih angin "Hospital Board-in a tûl angin hma lo la rawh se," tih a ni.

10. Living Allowance (L.A.) tihpun: Synod Finance Committee-in a rawt angin Synod hnuaiia thawktute tan Living Allowance 15% (fifteen percent)-a tihpun remtih a ni a, April 2012 aţanga hman tan tur a ni ang.

He Allowance tihpun hian Synod hnuaiia thawk mekte leh Pensioner Dearness Allowance-te a huam ang a, Field Worker-te erawh chu a huam lo.

11. Thawktu sawn kual: Synod Service Board-in an dil angin Synod hnuaiia thawktu thenkhat sawn kual a ni a, hetiangin -

1) Pu Lalchhungliana, Manager, Synod Hospital chu Accountant, ATC-ah.

2) Pi Lalhriatpuii, Superintendent, Hmangaihna In chu Staff Nurse, Synod Rescue Home-ah.

(phêk hnihna thlur hnihnaah zawm a ni)



Editorial Staff

Rev. K. Lalpiangthara

Rev. B. Lalngkhakliana

Upa H. Ronghaka

Upa C.H. Thangkhuma

Tunlai khawvel chet vel dan han thlir hian kalphung pangngai duh tawk lohna a lian hle a, ram tam takah mipui lungawi loten kawng an zawh mup mup mai. Kohhranah pawh he rilru hian kua a hreuh ve zel niin a lang thei. Hetiang hunah hian Kohhran hruaitute

leh mipui pawhin ngaihtuahna sen lehzual a ngai a. Thil tih dan thlak zung a that zawk lem loh chin awm mah se ram mipui khawhawi leh rilru sukthlek mila insiam rem dan zawn hi hruaitute ngaihtuahna luah tu a nih a t̄ul khawp mai. Kohhranah chuan thil tihdanglam a awm pawhin tih rum rum aiin mipui sukthlek dan leh boruak thlira zawi zawia tih thin a ni tih erawh chu hruaitu leh mipuiin hriat tlan a t̄ul ve bawkw awm e.

K.Ṭ.P GENERAL CONFERENCE ROPUI

Mizorama thalai intawh khawmna lian ber, Kristian Thalai Pawl General Conference vawi 54-na chu March 1-4, 2012 chhung khan Thenzawl Public Playground-ah hman a ni a; he Conference hmang tura riak l̄uta kal zawng zawng chu 23,130 an ni a, Wales at̄angin mi pathum, Taiwan at̄angin mi panga an lo kal a; PYF, NEICCYA, KJP Synod (Sepngi), Biateram Synod, CHT Synod leh LIKKBK at̄angin pahnih theuh an lo kal bawkw.

CKṬP Leader Rev. K. Lalpiangthara kaihhruiin May ni 2 khan rorel a ni a, K.Ṭ.P General Conference thlengtu tur indawt, kum rei zawk atana ruat lawk te; Chhawmdawlna puala inkhawm thawhlawm lak khawm te; Ram pum huap t̄awngt̄ai t̄aivar te; Mental health, Work ethic leh ngaihhlut tur dik inzirtirna buatsaih te; Krismas Hla Bu thar changtlung zawk siam te an rel a. Kum 2012-2013 Budget ruahman ₹ 12,00,000/- an pawm bawkw.

Central K.Ṭ.P hruaitu thlan thar kum a ni a, Committee member 18 thlang chhuakin an zing at̄angin Office Bearer ruat leh an ni a, chungte chu -

Leader : Rev. Lalrinmawia (Synod ruat)

Asst. Leader : T. Upa Dr. Samuel Vanlalhlanga
Luangmual Bial

Gen. Secretary : Upa Lalrinmuana (Synod ruat)

Asst. Secretary : Tv V.L. Muanchhana, Mission Veng Bial

Treasurer : Upa Zothangzuala Chhangte,
Chanmari Bial

Fin. Secretary : Pu Zohmangaiha, Khatla Bial

Ruahsur avanga a hun taka inkhawm tan hleih theih loh a awm zeuh tih loh chu hun hman tura duan lawk tha takin hman a ni a. Pandal sak leh mikhual thlen chungchangah Kohhran Pawl hrang hrang an tangrual tha hle a. Khawtlang nawlpui inpumkhatna leh thawhhona duhawm tak avangin Central KṬP Committee pawh a lawm tak zet a ni.

phêk khatnaa mi zawm

3) Nl. Vanlalsawmi, Asst.Co-ordinator, Kohhran Hmeichhia/Warden, Girls' Hostel chu Synod Archive/Warden, Girls' Hostel.

4) Pi Laldawnkimi, Archivist, Synod Archives (Synod Office) chu Superintendent, Hmangaihna In-ah.

12. Student Nurse Book Grant: SEC-in ruahmanna siam tura a tih angin Synod Hospital Board-in Student Nurse Book Grant pek dan tur ruahmanna an siam chu pawm a ni. Hetiangin :-

1) 1st Year Student-te tan : ₹ 4,000/- p.a

2) 2nd Year Student-te tan : ₹ 3,000/- p.a

3) 3rd Year Student-te tan : ₹ 2,000/- p.a

April, 2012 at̄anga hman tan tur a ni ang.

13. ATC Doctoral Study Centre atana siam: 2011 Synod-in hemi chungchang a lo rel chu bawhzuiin hemi atana mamawh te, hma lakna turte sawi a ni a. 'Tihhlawhtlin a nih theih nana hma lak chu Theological Education Board kutah dah a ni.

14. Sipai Pastor-a luh dan tur kawng zawn thua Synod thurel chungchangah, "Office lamin lo bawhzui sela, sipai Pastor ni tura hriat t̄ulte Pastor-te hnenah hriattir ni sela, Office-ah sipai Pastor nih duhte inhriattirin, kal duh an awm chuan Synod Service Rules 2009, Bung 11:18 anga kal ni se," tih a ni.

15. Mizoram Synod Choir din kum tihchian : SEC-in Mizoram Synod Choir din kum tihchian tha tia hemi chungchang chhuitu tura a ruatte chhui chhuah dan chu thlir ho a ni a. Synod hnuaiia Zaipawl din hmasak ber, 1929-a din chu Sylhet-ah Mizo Synod-in a lo tir tawh tih hriat a ni. Synod-in Zaipawl a din hmasak ber 1929 hi Mizoram Synod Choir din kumah pawm a ni a. A din ni leh thla hi a theih ang angin Office lam chhui zui tura dah a ni.

16. Rawngbawlina atana mamawh ram lei: Synod 2011-in a rel angin Aizawl khawpui chheh vela ram lei tur tha leh remchang tak awm chu lei tura tih a ni a, OM bawhzui atan dah a ni. India ram khawpui ber New Delhi-ah pawh Kohhran rawngbawl zelna atana mamawh tur ram lei tur tha leh remchang tak hmuh a ni a, lei dan kawng zawn tha tih niin Finance Committee bawhzui tura dah a ni.

17. CSI Retreat: Church of South India-in an Kohhran hruaitu, Bishop leh an kawppuite puala Aizawla Retreat buatsaih leh he retreat-a kalte lo buaipui tura Mizoram Synod an ngenna chu remtihsak an ni a, a t̄ul anga O.M.-in a rel fel tura dah a ni.

Heng bakah hian zir chian hnuai ruahmanna siam thar tur leh siam tawh sate enawna SEC leha rel leh tura tih eng emaw zat a awm bawkw.



Râl Vêngtu chu khawpui kulh chung zawl, a râl vên búka a din vang vang lai chuan khawpui kulh pawn lama mipui pung khawm hi a zuk hmu a, khawpui mi, kulh chhung ațanga chhuaka tel ve ta pawh an awm nualin a hria a. Râl Vêngtu chuan an chet vel dan chu intihhlamna (*concert*)-a thil tih dan nen inang a ti hle a. An țin darh hnu chuan chuta tel ve ținkhath chu Râl Vêngtu hnenah an lo kal a.

Râl Vêngtu chuan, “Kulh pawn lama intihhlamnaah khan in tel ve a ni maw?” tiin a lo zawt thuai a. Anni chuan, “Tel ve e, intihhlamna pawh a ni lo, thlarau lam thu alawm kan ngaihtlak ve tho. TV-a sawmna an siam kan hmu a, tel ve kan châk ta tlat pek alawm maw le”, an ti a. Râl Vêngtu chuan, “In beisei ang a ni meuh em?” a ti leh hram a. Anni chuan, “Khawpui hotute thu sawi nen a danglam vak lo va, a danglamna chu an tawn hriat leh inlarna an hmuh huai taka an sawi te, khawpui hotute tlin lohna an sawi te kha a ni mai âwm e,” tiin an chhang hlawm a.

Râl Vêngtu chuan, “Kulh pawn lama chaw tui zawk awma hriat tlatna hi mahni nupui pasalte aia mi nu leh mi pa ít tlatna rilru nen ang khat a ni a, chutiang rilru pute chu chhungkaw tikeh chhetu leh mualphona zakhua thlentun an ni țin. Khawpui kulh pawn lamah hian hlalna thuk zawk awmin lang țin mah se, khawpui inpumkhatna tichhetu a ni tih in thu ngaihtlak ațang pawh chuan a hriat mai lo’ m ni?” tiin a kamkhat a.

Mite chuan kulh pawn lama an thu ngaihtlak chu ngun taka an ngaihtuah let chuan Râl Vêngtu sawi chu dik hlein an hria a, kulh pawn lam intihhlamna chu chaw tak khuka khukupui chiam tur chi nia ngai tawh lovin inthiam lo rilru tak chungin an haw ta dam dam a.

CAMPUS MINISTRY

Synod hnuaia Campus Ministry rawngbawlna țin a ni leh ta a, hei hi High School ațanga University thlenga rawngbawlna a ni. Devotion hmanpui te, Bible Study te, Retreat/Crusade/Camping-te an neihpui thei a, tunlaia nun khawih buaitu hrang hrang pawh an zirpui thei bawk. Rawngbawlna neihpui duh tan **8974560071 & 0389 - 2326372**-ah biak theih a ni.

Heng bakah hian Synod Social Front nen țin kawpin zirlaite tan **Helpline** siam a ni a, Counsellor thiam bikin ținthilhin eng lai pawha biak pawh theih reng a ni a, balance nei lo pawh an phone let thei reng a ni. **Helpline No. 9856883377.**

**SYNOD HOSPITAL, DURTLANG
FEBRUARY, 2012 CHHUNGA THILPEK DAWNTE**

I. CHARITY FUND		
1.	KTP, Zuangtui Branch	Rs. 9,356
2.	Pu Lalnunsanga, Durtlang Dawrkawn	Rs. 1,000
3.	Pu Hualhnuna, Sihphir Venghlun	Rs. 500
4.	Pu C. Lalramliana te nupa, Durtlang Mel 5	Rs. 1,000
5.	Aibawk Bial KTP	Rs. 3,000
6.	Zochhuani Malhotra, Zarkawt, Aizawl	Rs. 25,000
7.	Gateway Enterprise, Bawngkawn, Aizawl	Rs. 1,000
	Total	Rs. 40,856
II. THISEN PETE		UNIT PEK ZAT
1.	KTP, Kawnpui Hmar Veng Branch	45 Units
2.	Synod Hospital Staff	32 Units
3.	Thianzaho (Valentine's Day denchenin)	16 Units
4.	KTP, Khatla North Branch	43 Units
5.	School of Nursing, Synod Hospital	43 Units
6.	Red Ribbon Club, NIELIT, Zuangtui	147 Units
7.	KTP, Sihphir Vengpui Branch	34 Units
8.	Govt. Zirtiri Residential Science College, Aizawl	66 Units
9.	KTP, Khatla South Branch	34 Units
10.	KTP, Mission Vengthlang Branch	63 Units
11.	KTP, Zemabawk Vengthar Branch	26 Units
12.	KTP, Durtlang Pastor Bial	53 Units
13.	KTP, Model Veng Branch	51 Units
14.	College of Teacher Education, Aizawl	17 Units
	Total	670 Units
III THIL DANG PETE		
1.	Zawlnuam Bial KTP	Plastic chair 6
2.	Darlung Bial KTP	Hmunphiah 108
IV GRACE HOME PUAL THILPEK		
1.	Central KTP	Rs. 226,500
2.	Ramhlun North Presbyterian Kohhran	Rs. 20,000
	Total	Rs. 246,500

Khawngaihna leh duhsakna avanga kan Lalpa Isua Krista hminga thilpek min petu zawng zawngte hnenah Isua Krista hmingin lawmthu kan sawi tak meuh meuh a ni e.

Sd/-
(DR. LALREMTANGA)
Director
Synod Hospital.

SAWMNA

Vanchengpui Kohhran chuan March 15 - 18, 2012 chhung hian an Kohhran Centenary lawm an tum a. He hun hmanpui tur hian Vanchengpui Pastor leh Pro. Pastor lo ni tawh zawng zawngte leh Vanchengpui Kohhrana lo lawi tawh zawng zawngte an sawm a. Sawmna hranpa siam an tum loh avangin hei hi sawmnaa ngaihsak turin an ngen a ni.



Samtlang Kohhran chuan December 1, 2011 - Jan. 16, 2012 chhung khan Jehova Jire Team Speaker, Pu C. Ramtharngaha ruaiin Siamtharlehna Camping chhawng li leh Crusade an buatsaih a. Kohhranah harhna ropui tak a thleng a. Tisa ruai pawh ropui takin tum thum lai buatsaih a ni. Pi Hmangaihthangin Pathian chawimawi nan vawk a thawh a. Kohhranhoten Pathian Thlarau pawlharna ropui tak an chang.

Serhmun Kohhran chuan February 13 - 19, 2012 chhung khan Krista Remna Palai Team Speaker Pu Jerry Laltnpuia ruaiin Crusade an nei a; Kohhranhoten an hlut hle a. He Crusade hi Kohhran pawl dangte pawhin an chhim ve a; Biak In thleng ngai tawh lo eng emaw zat an inkhawm phah bawk.

Nisapui Kohhran chuan January 24 - Feb. 19, 2012 chhung khan Hunter For Christ Team Speaker Pu C. Lalenga ruaiin Camping chhawng li an buatsaih a, Campers mi 341 an lut a. Kohhran dang atangin mi 11 an lut bawk a. Pathian Thlarau Thianghlim hnathawh a thleng nasa hle. Inkhawm ngai tawh lote pawhin Biak Inah Pathian an fak a. Biak In lam tuala leng lo khawpin an lam a ni. Mi thahnemngaithe thilpek hmangin Pathian chawimawina ruai ropui tak theh a ni bawk. Kohhranhoten an hlawkpui hle.

Hmuntha Kohhran chuan January 24 - February 9, 2012 chhung khan Dintharlehna Team Speaker Tv. C. Zairemmawia ruaiin Crusade leh Camping an buatsaih a. Kohhran dang atangin mi eng emaw zat an lut. Ruihhlo ngaite leh Biak In hnaih ngai loten inkhawm an ngai pawimawh thar a, Pathian huat zawng thil tha lo an halral a. Mi thahnemngai pathum laiin vawk an thawh nghe nghe. Kohhran boruak a nuam hle.

Maite Kohhran chuan November 22 - December 2, 2011 chhung khan Krista Kros Thlangtute Team Speaker, Tv. Lalngaihzuala ruaiin Camping an buatsaih a, Campers 88 an lut. Kohhranah hartharna a thleng a, an hlawkpui hle.

Chhungte Kohhran, Champhai chuan November 19 - December 4, 2011 chhung khan Remna Palai Team Speaker, Pu C. Sapchhawna ruaiin Camping chhawng thum an buatsaih a. Biak In thleng ngai loten piantharna leh siamtharna changin Biak in leh Kohhran lenkhawmnahte an hun an hmang a, Kohhran bakah khawtlangin an hlawkpui hle.

Cherhmun Kohhran chuan February 13 - 19, 2012 chhung khan Gospel Penial Team Speaker Pu R. Laltnchhuaha ruaiin Crusade an buatsaih a, Kohhranin an hlawkpuiin Kohhran pawn lam atang pawhin chhimtu an nei thin a, an lawm hle.

SAWMNA

Serchhip Vengchung Kohhran chuan March 28 - April 1, 2012 chhung hian an Kohhran kum 100 tlin an lawm dawn a, He Kohhrana lo lawi tawh zawng zawng leh Bialtu Pastor leh Pro. Pastor lo ni tawh zawng zawngte hmanpui turin an sawm.

REVIVAL SPEAKER-TE INTUAITHARNA

Synod Revival Committee chuan Revival Speaker a lak thar mi 70-te pualin Synod Revival Camping Centre, Neihbawih-ah February 27-29, 2012 chhung khan riak luta intuaitharna (Residential Retreat) a buatsaih a, dam lohna avanga tel thei lo pahnih tih loh chu an tel vek a ni. February 27 (Thawhtanni) chawhnu dar 1:00-ah Retreat hawn a ni a, Rev. Lalchangliana, Director, Synod Revival Department-in kaihruaiin Retreat hi a hawng nghal a. Upa D.P. Biakkhuma, Synod Secretary-in Key-note Address a sawi.

Thupui chi hrang hrang ngaihthlak a ni a, hetiangin -**'Kohhran enkawlna leh thuhritute'**, sawitu: Upa C. Sangzuala; **'Pathian thu sawi dan tha'**, sawitu: Rev. H. Lalchhanhima; **'Thuhritu tana Theology pawimawhna'**, sawitu: Rev. Dr. Tlanghmingthanga; **'Thuhritu nun leh mawhphurhna'** sawitu: Rev. K. Lalhmingliana; **'Kristian chhungkaw pawimawhna'** sawitu: Rev. Zothansanga; **'Media hmanga rawngbawlna'**, sawitu: Upa Bonny Lalrindika. Rawngbawlna thlir letna leh infuihna hun hman a ni bawk.

February 29 (Nilaini)-a Retreat kharna inkhawm chu Rev. Zosangliana Colney, Executive Secretary i/c Revival, etc-in kaihruaiin Rev. Thangzauva, Synod Moderator-in Pathian thuchah a sawi a, tawngtai rualna neih a ni bawk.

WILL GRAHAM CRUSADE

Ruahman lawk angin February 17 - 19, 2012 chhung khan Joint YMA Field, Vaivakawnah hlawhtling taka hman a ni a; mipuiin an hlut hle. Hemi chungchang hi ziak tur a tam deuh avangin Kristian Tlangau March leh April 2012-ahte kimchang deuhva chhuah tum a ni.

Crusade-a thu sawi DVD lei duh tan Synfo, Synod Office-ah lei duh lai ber sawia siamtir theih a ni e.

PATHIAN THU ZIR DUH TAN

Presbyterian Bible School, Mission veng-ah Session 25-na atan Certificate in Theology (C.Th) Admission hawn a ni a. Dil duhte tan a hnuaia tarlan hi hriat tur a ni e.

Admission Form : Office-ah Rs. 10-a lei theih a ni.
 Dil theih hun : May 4, 2012 tlai dar 3:00 thleng
 Dil thei chin : Class VII Passed, Kum 16 chin, Kohhran dan chhunga awm
 Interview hun : May 8, 2012 chawhma dar 10:00
 Class tan hun : May 14, 2012
 Zir hun chhung : May - August, 2012
 Stipend : Zirlai pakhat hnenah thla tin Rs. 500:00 pek a ni anga, Hostel a awm lovang.

Sd/- Rev. R. Lalengmawia
 Principal, Ph-857530800/23174343